



P R A V I L N I K
o predizbornim i postizbornim finansijskim izvještajima i izvještajima o
prometu posebnog računa za finansiranje izborne kampanje
nezavisnih kandidata

Sarajevo, maj 2026. godine

Na osnovu člana 15.2 stav (1) Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16 i 41/20, 38/22, 51/22, 67/22 i 24/24), Centralna izborna komisija Bosne i Hercegovine je na 29. sjednici, održanoj 06.05.2026. godine, donijela

P R A V I L N I K
o predizbornim i postizbornim finansijskim izvještajima i izvještajima o
prometu posebnog računa za finansiranje izborne kampanje nezavisnih
kandidata

POGLAVLJE I. UVODNE NAPOMENE

Član 1.
(Primjena)

Pravilnikom o predizbornim i postizbornim finansijskim izvještajima i izvještajima o prometu posebnog računa za finansiranje izborne kampanje nezavisnih kandidata (u daljem tekstu: Pravilnik) uređuje se način podnošenja predizbornog finansijskog izvještaja, postizbornog finansijskog izvještaja i izvještaja o prometu posebnog računa za finansiranje izborne kampanje nezavisnih kandidata, sadržaj i forma finansijskih izvještaja, kontrola finansijskih izvještaja koje su nezavisni kandidati koji učestvuju na izborima obavezni podnositi Centralnoj izbornoj komisiji Bosne i Hercegovine (u daljem tekstu: Centralna izborna komisija BiH) i način pristupa javnosti informacijama sadržanim u finansijskim izvještajima nezavisnih kandidata.

Član 2.
(Obim primjene)

Odredbe ovog Pravilnika primjenjuju se na sve nezavisne kandidate koji učestvuju na izborima za organe vlasti Bosne i Hercegovine, uključujući nezavisne kandidate koji učestvuju na izborima za organe vlasti Bosne i Hercegovine u okviru liste nezavisnih kandidata.

POGLAVLJE II. NAČIN PODNOŠENJA FINANSIJSKIH IZVJEŠTAJA

Član 3.
(Način podnošenja)

(1) Nezavisni kandidati koji učestvuju na izborima za organe vlasti Bosne i Hercegovine na svim nivoima dužni su Centralnoj izbornoj komisiji BiH podnijeti:

- a) finansijski izvještaj koji obuhvata period koji počinje tri mjeseca prije dana podnošenja prijave za ovjeru i završava danom podnošenja prijave za ovjeru (predizborni izvještaj);
- b) izvještaj o prometu posebnog računa za finansiranje izborne kampanje s podacima o izvorima novčanih i nenovčanih donacija, troškovima izborne kampanje i računima dobavljača;
- c) dodatni finansijski izvještaj za period od dana podnošenja prijave za ovjeru do dana ovjere izbornih rezultata (postizborni izvještaj).

(2) Nezavisni kandidati koji učestvuju na izborima finansijske izvještaje iz stava (1) ovog člana podnose Centralnoj izbornoj komisiji BiH u elektronskoj formi putem aplikacije.

(3) Potvrdu o podnesenim finansijskim izvještajima te odštampane i potpisane obrasce finansijskih izvještaja iz stava (1) tačke a) i c) ovog člana, u PDF formatu, nezavisni kandidati dostavljaju Centralnoj izbornoj komisiji BiH i u tvrdoj kopiji.

(4) Potvrdu o podnesenom finansijskom izvještaju te odštampane i potpisane obrasce finansijskog izvještaja iz stava (1) tačka b) ovog člana, u PDF formatu, nezavisni kandidati dostavljaju Centralnoj izbornoj komisiji BiH putem e-adrese.

(5) Centralna izborna komisija BiH može zatražiti od nezavisnih kandidata podnošenje i dodatnih finansijskih izvještaja, dokumenata, objašnjenja i informacija, ako ih smatra neophodnim za potpuno i tačno obavljanje revizije.

Član 4. (Rokovi)

(1) Finansijski izvještaj iz člana 3. stav (1) tačka a) ovog Pravilnika podnose svi nezavisni kandidati u vrijeme podnošenja prijave za ovjeru za učešće na izborima.

(2) Finansijski izvještaj iz člana 3. stav (1) tačka b) podnosi se tri dana prije dana održavanja izbora.

(3) Finansijski izvještaj iz člana 3. stav (1) tačka c) ovog Pravilnika podnose svi nezavisni kandidati koji su učestvovali na izborima, i to u roku od 30 dana od dana kada Centralna izborna komisija BiH objavi konačne izborne rezultate.

Član 5. (Ovlašteno lice za podnošenje izvještaja)

(1) Nezavisni kandidat može imenovati ovlašteno lice koje je lično odgovorno za podnošenje finansijskih izvještaja i koje je ovlašteno da kontaktira s Centralnom izbornom komisijom BiH.

(2) Nezavisni kandidat obavještava Centralnu izbornu komisiju BiH o imenovanju ovlaštenog lica iz stava (1) ovog člana u roku od 15 dana od njegovog imenovanja i u slučaju bilo kakve promjene statusa tog lica, dužan je u roku od 15 dana obavijestiti Centralnu izbornu komisiju BiH o toj promjeni.

POGLAVLJE III. SADRŽAJ I FORMA FINANSIJSKIH IZVJEŠTAJA

Član 6. (Obrasci predizbornog i postizbornog finansijskog izvještaja)

(1) Finansijske izvještaje iz člana 3. stav (1) tačke a) i c) ovog Pravilnika nezavisni kandidat podnosi na obrascima koji su sastavni dio ovog Pravilnika, a to su:

- | | |
|----------------------------------------------------------------------------------------|---------------|
| a) Podaci o nezavisnom kandidatu | Obrazac N1. |
| b) Pregled prometa novčanih sredstava | |
| 1) Pregled prometa tekućeg računa | Obrazac N2. |
| 2) Pregled prometa gotovine putem blagajne | Obrazac N2.1. |
| c) Izvori finansiranja nezavisnog kandidata | Obrazac N3. |
| 1) Prilozi fizičkih lica | Obrazac N3.1. |
| 2) Prilozi pravnih lica | Obrazac N3.2. |
| 3) Nenovčane donacije i računi koje nezavisni kandidat nije imao obavezu platiti | Obrazac N3.3. |
| 4) Prihodi nezavisnog kandidata iz budžeta | Obrazac N3.4. |
| 5) Prihodi od prodaje propagandnog materijala i prihodi od organiziranja manifestacija | Obrazac N3.5. |
| 6) Ostali prihodi | Obrazac N3.6. |

- | | |
|-----------------------------------------------|---------------|
| d) Rashodi nezavisnog kandidata | Obrazac N4. |
| 1) Režijsko-administrativni i ostali troškovi | Obrazac N4.1. |
| 2) Troškovi propagande | Obrazac N4.2. |
| e) Obaveze nezavisnog kandidata | Obrazac N5. |
| 1) Obaveze po kreditima i pozajmicama | Obrazac N5.1. |
| 2) Ostale obaveze | Obrazac N5.2. |

(2) Nakon što nezavisni kandidat unese podatke u obrasce predizbornog i postizbornog finansijskog izvještaja u aplikaciju, dužan je Centralnoj izbornoj komisiji BiH dostaviti odštampan i potpisan predizborni i postizborni finansijski izvještaj u PDF formatu, kao i potvrdu o podnesenom izvještaju iz aplikacije.

Član 7.

(Obrasci izvještaja o prometu posebnog računa za finansiranje izborne kampanje)

(1) Finansijski izvještaj iz člana 3. stav (1) tačka b) ovog Pravilnika nezavisni kandidati podnose na obrascima koji su sastavni dio ovog Pravilnika, a to su:

- | | |
|----------------------------------------------------------------------------------|----------------|
| a) Podaci o nezavisnom kandidatu | Obrazac N1. |
| b) Pregled prometa tekućeg računa | Obrazac N2. |
| c) Prilozi fizičkih lica | Obrazac N3.1. |
| d) Prilozi pravnih lica | Obrazac N3.2. |
| e) Nenovčane donacije i računi koje nezavisni kandidat nije imao obavezu platiti | Obrazac N3.3. |
| f) Troškovi propagande | Obrazac N4.2. |
| g) Podaci o računima dobavljača | Obrazac N4.2 D |

(2) Nakon što nezavisni kandidat unese podatke u obrasce izvještaja o prometu posebnog računa za finansiranje izborne kampanje u aplikaciju, dužan je Centralnoj izbornoj komisiji BiH dostaviti odštampan i potpisan izvještaj o prometu posebnog računa za finansiranje izborne kampanje u PDF formatu, putem e-adrese, kao i potvrdu o podnesenom izvještaju iz aplikacije.

Član 8.

(Potvrda o primljenom prilogu)

(1) Nezavisni kandidat dužan je svakom fizičkom i pravnom licu (u daljem tekstu: donator) od kojeg je primio prilog izdati potvrdu u kojoj su sadržani sljedeći podaci: serijski broj potvrde, ukupan iznos priloga, ime i prezime/naziv donatora, broj ličnog dokumenta/identifikacioni broj donatora, adresa i mjesto prebivališta/sjedište donatora, datum uplate, datum izdavanja potvrde i potpis nezavisnog kandidata ili ovlaštenog lica.

(2) Potvrda iz stava (1) ovog člana izdaje se u dva (2) primjerka, od kojih se jedan daje donatoru, a drugi zadržava nezavisni kandidat.

(3) Centralna izborna komisija BiH može zahtijevati da nezavisni kandidat dostavi kopije izdatih potvrda.

Član 9.

(Popunjavanje obrazaca)

(1) Prilikom podnošenja finansijskih izvještaja iz člana 3. stav (1) tačke a) i c) ovog Pravilnika, nezavisni kandidat dužan je podnijeti popunjene sve obrasce navedene u članu 6. ovog Pravilnika.

(2) Prilikom podnošenja finansijskih izvještaja iz člana 3. stav (1) tačka b) ovog Pravilnika,

nezavisni kandidat dužan je podnijeti popunjene sve obrasce navedene u članu 7. ovog Pravilnika.

(3) Obrasci moraju biti tačno i precizno popunjeni.

(4) Tačnost i potpunost podataka u svakom obrascu svojim potpisom ovjerava nezavisni kandidat ili ovlašteno lice kojeg ovlasti u skladu s odredbama člana 5. ovog Pravilnika.

Član 10.

(Podaci o nezavisnom kandidatu)

(1) U Obrazac N1. *Podaci o nezavisnom kandidatu* unose se svi podaci o nezavisnom kandidatu na kojeg se finansijski izvještaj odnosi, i to:

- a) ime i prezime,
- b) broj ličnog dokumenta,
- c) adresa, telefon, faks i e-adresa i
- d) ovlašteno lice za finansijske izvještaje: ime i prezime, adresa, telefon, faks i e-adresa.

(2) Pored navedenih podataka, nezavisni kandidat u aplikaciju unosi i jedinstveni matični broj koji se koristi u svrhu utvrđivanja identiteta nezavisnog kandidata.

(3) Podaci o nezavisnom kandidatu: jedinstveni matični broj, broj ličnog dokumenta, adresa, telefon, faks i e-adresa neće biti dostupni javnosti.

Član 11.

(Pregled prometa tekućeg računa)

U Obrazac N2. *Pregled prometa tekućeg računa* unose se sljedeći podaci:

- a) broj računa,
- b) naziv banke,
- c) stanje računa na početku izvještajnog perioda za koji se podnosi finansijski izvještaj, odnosno stanje na dan otvaranja računa, ako je račun otvoren nakon tog datuma,
- d) ukupan promet ulaza bez početnog salda (za izvještajni period),
- e) ukupan promet izlaza (za izvještajni period) i
- f) stanje računa na kraju izvještajnog perioda za koji se podnosi izvještaj, odnosno do momenta gašenja računa, u slučaju da je račun ranije ugašen.

Član 12.

(Pregled prometa gotovine putem blagajne)

U Obrazac N2.1. *Pregled prometa gotovine putem blagajne* unose se sljedeći podaci:

- a) saldo blagajne na početku perioda,
- b) ukupni ulazi u blagajnu,
- c) ukupni izlazi iz blagajne i
- d) saldo blagajne na kraju perioda.

Član 13.

(Izvori finansiranja)

(1) U Obrazac N3. *Izvori finansiranja* unose se sljedeći podaci:

- a) Prilozi fizičkih lica (detalji u Obrascu N3.1.)
ukupan iznos naplaćen u KM
- b) Prilozi pravnih lica (detalji u Obrascu N3.2.)
ukupan iznos naplaćen u KM

- c) Nenovčane donacije i računi koje nezavisni kandidat nije imao obavezu platiti (detalji u Obrascu N3.3.)
ukupan iznos ostvarenog prihoda u KM
- d) Prihodi nezavisnog kandidata iz budžeta (detalji u Obrascu N3.4.)
ukupan iznos ostvarenog prihoda u KM
- e) Prihodi od prodaje propagandnog materijala i prihodi od organiziranja manifestacija (detalji u Obrascu N3.5.)
ukupan iznos ostvarenog prihoda u KM
- f) Ostali prihodi u izvještajnom periodu (detalji u Obrascu 3.6.)
ukupan iznos ostalih prihoda u KM
- g) Ukupni prihodi nezavisnog kandidata u izvještajnom periodu u KM

(2) Ako nezavisni kandidat ostvari prihod koji nije obuhvaćen članom 13. stav (1) tačke od a) do e) Pravilnika ili ostvari koristi od aktivnosti subjekata koji su na bilo koji način povezani s nezavisnim kandidatom ili su pod njegovom kontrolom, dužan je takve prihode iskazati u Obrascu 3.6. *Ostali prihodi* finansijskog izvještaja.

(3) Ukoliko nezavisni kandidat ne raspolaže podacima iz kojih se može utvrditi identitet donatora, smatrat će se da je nezavisnom kandidatu prilog dao anonimni donator.

Član 14. **(Prilozi fizičkih lica)**

(1) U Obrazac N3.1. *Prilozi fizičkih lica* unose se sljedeći podaci:

- a) ime i prezime donatora
- b) broj potvrde iz člana 8. ovog Pravilnika,
- c) datum prijema priloga,
- d) iznos priloga i
- e) ukupan iznos svih priloga fizičkih lica.

(2) Podaci o donatoru sadrže sljedeće podatke: ime i prezime, jedinstveni matični broj, broj ličnog dokumenta te adresu i mjesto prebivališta.

(3) Podaci iz stava (2) ovog člana unose se u aplikaciju i koriste u svrhu utvrđivanja identiteta donatora prilikom kontrole finansijskih izvještaja nezavisnih kandidata. Jedinstveni matični broj, broj ličnog dokumenta, adresa i mjesto prebivališta donatora neće biti dostupni javnosti.

Član 15. **(Prilozi pravnih lica)**

(1) U Obrazac N3.2. *Prilozi pravnih lica* unose se sljedeći podaci:

- a) naziv pravnog lica,
- b) broj potvrde iz člana 8. ovog Pravilnika,
- c) datum prijema priloga,
- d) iznos priloga i
- e) ukupan iznos svih priloga pravnih lica.

(2) Podaci o donatoru sadrže sljedeće podatke: naziv pravnog lica, identifikacioni broj i sjedište donatora.

(3) Podaci iz stava (2) ovog člana unose se u aplikaciju i koriste u svrhu utvrđivanja identiteta donatora prilikom kontrole finansijskih izvještaja nezavisnih kandidata.

Član 16. **(Nenovčane donacije i računi koje nezavisni kandidat nije imao obavezu platiti)**

(1) U Obrazac N3.3. *Nenovčane donacije i računi koje nezavisni kandidat nije imao obavezu platiti* unose se sljedeći podaci:

- a) ime i prezime/naziv donatora,
- b) vrsta dara ili usluge,
- c) datum primljenog dara ili usluge,
- d) ukupna vrijednost dara ili usluge,
- e) vrijednost koju nezavisni kandidat nije imao obavezu platiti i
- f) ukupan iznos nenovčanih donacija.

(2) Podaci o fizičkom licu/donatoru sadrže sljedeće podatke: ime i prezime, jedinstveni matični broj, broj ličnog dokumenta te adresa i mjesto prebivališta.

(3) Podaci iz stava (2) ovog člana unose se u aplikaciju i koriste u svrhu utvrđivanja identiteta donatora prilikom kontrole finansijskih izvještaja nezavisnih kandidata. Jedinstveni matični broj, broj ličnog dokumenta, adresa i mjesto prebivališta donatora neće biti dostupni javnosti.

(4) Podaci o pravnom licu/donatoru sadrže sljedeće podatke: naziv pravnog lica, identifikacioni broj i sjedište donatora.

(5) Podaci iz stava (4) ovog člana unose se u aplikaciju i koriste u svrhu utvrđivanja identiteta donatora prilikom kontrole finansijskih izvještaja nezavisnih kandidata.

Član 17.

(Prihodi nezavisnog kandidata iz budžeta)

(1) U Obrascu N3.4. *Prihodi nezavisnog kandidata iz budžeta* evidentiraju se sva sredstva iz budžeta svih nivoa vlasti koje je nezavisni kandidat primio u izvještajnom periodu.

(2) U ovaj obrazac unose se sljedeći podaci:

- a) naziv nivoa vlasti,
- b) broj i datum odluke,
- c) ukupan iznos prihoda i
- d) ukupan iznos prihoda nezavisnog kandidata u izvještajnom periodu.

Član 18.

(Prihodi od prodaje propagandnog materijala i prihodi od organiziranja manifestacija)

U Obrazac N3.5. *Prihodi od prodaje propagandnog materijala i prihodi od organiziranja manifestacija* unose se sljedeći podaci:

- a) vrsta prihoda, i to:
 - prihodi od prodaje propagandnog materijala,
 - prihodi od organiziranja manifestacija;
- b) ukupan iznos ostvarenog prihoda.

Član 19.

(Ostali prihodi)

U Obrazac N3.6. *Ostali prihodi* unose se sljedeći podaci:

- a) iznos ostalih prihoda,
- b) opis ostalih prihoda i
- c) ukupan iznos ostalih prihoda.

Član 20.

(Rashodi nezavisnog kandidata)

U Obrazac N4. *Rashodi nezavisnog kandidata* unose se sljedeći podaci:

- a. režijsko-administrativni i ostali troškovi (detalji u Obrascu N4.1.),

- b. troškovi propagande (detalji u Obrascu N4.2.) i
- c. ukupni rashodi u izvještajnom periodu po svim osnovama.

Član 21.

(Režijsko-administrativni i ostali troškovi)

(1) U Obrazac N4.1. *Režijsko-administrativni i ostali troškovi* (unose se svi troškovi osim troškova propagande) unose se sljedeći podaci:

- a) vrsta troška,
- b) iznos troškova i
- c) ukupan iznos troškova.

(2) Ako nezavisni kandidat ostvari troškove od stjecanja propagandnog materijala namijenjenog za prodaju i organiziranja manifestacija, dužan je uz Obrazac N4.1. dostaviti posebnu specifikaciju koja će sadržavati: iznos i vrstu ostvarenog troška i druge činjenice kojima se dokazuje da je ostvareni trošak nastao u svrhu ostvarivanja prihoda nezavisnog kandidata.

Član 22.

(Troškovi propagande)

(1) U Obrazac N4.2. *Troškovi propagande* unose se sljedeći podaci:

- a) vrsta troška, i to:
 - 1) troškovi štampanja plakata i plakatiranja,
 - 2) troškovi oglašavanja u štampanim i elektronskim medijima,
 - 3) troškovi internetskog oglašavanja,
 - 4) troškovi štampanja, umnožavanja i slanja predizbornog materijala biračima,
 - 5) troškovi zakupa sala za predizbornu kampanju,
 - 6) troškovi organizacije i održavanja predizbornih skupova i
 - 7) ostali troškovi propagande;
- b) ukupan iznos.

(2) U smislu troškova štampanja plakata i plakatiranja smatraju se svi troškovi koji su direktno povezani s izradom, pripremom i objavljivanjem promotivnih materijala za oglašavanje političkih poruka, uključujući izradu svih vrsta plakata, banera i bilborda, troškove štampanja, troškove distribucije, troškove postavljanja i uklanjanja plakata, kao i sve druge direktne troškove nastale u postupku štampanja i plakatiranja.

(3) U smislu troškova oglašavanja u štampanim i elektronskim medijima podrazumijevaju se troškovi objavljivanja i štampanja predizbornih oglasa, proglašenja, saopćenja i drugih promotivnih sadržaja u štampanim medijima, kao i troškovi oglašavanja u elektronskim medijima, uključujući radio i televiziju (oglasni, javni pozivi, spotovi i drugi oblici političke promocije).

(4) U smislu troškova internetskog oglašavanja podrazumijevaju se troškovi plaćenog oglašavanja i promocije političkih sadržaja putem interneta, uključujući internetske portale, društvene mreže i digitalne platforme (Facebook, YouTube, Instagram, X/Twitter i dr), aplikacije za razmjenu poruka (Viber i slične), kao i druge oblike digitalnog oglašavanja koji se ne emitiraju putem radija i televizije.

(5) U smislu troškova štampanja, umnožavanja i slanja predizbornog materijala biračima podrazumijevaju se troškovi materijala koji se šalje na adrese birača poštom ili preko aktivista, dijeli putem štandova i na predizbornim skupovima.

(6) U smislu troškova zakupa sala za predizbornu kampanju podrazumijevaju se troškovi zakupa zatvorenih ili otvorenih prostora (sale, dvorane, domovi kulture, sportske dvorane i slični prostori) koji se koriste za održavanje predizbornih aktivnosti, uključujući sastanke, tribine, promocije i druge oblike predizbornog djelovanja.

(7) U smislu troškova organizacije i održavanja predizbornih skupova podrazumijevaju se troškovi ozvučenja i razglasa, troškovi prijevoza na predizborne skupove, troškovi honorara angažiranih učesnika (voditelji, estradni umjetnici – muzičari, glumci, orkestri, kulturno-umjetnička društva i dr), kao i drugi troškovi neposredno povezani s organizacijom i održavanjem predizbornih skupova.

(8) Pod ostalim troškovima propagande podrazumijevaju se troškovi nastali u svrhu predizborne kampanje koji nisu obuhvaćeni drugim kategorijama troškova propisanim ovim Pravilnikom, uključujući troškove reprezentacije i ugostiteljskih usluga, putne troškove, troškove po osnovu ugovora o djelu za lica angažirana za potrebe predizborne kampanje, troškove goriva, kao i druge slične troškove neposredno povezane s provođenjem predizborne kampanje.

Član 23. **(Podaci o računima dobavljača)**

(1) U Obrazac N4.2D *Podaci o računima dobavljača* unose se sljedeći podaci:

- a) vrsta troška,
- b) naziv dobavljača/izvršioca usluge i
- c) podaci o dokumentu (račun, ugovor ili drugo), i to:
 - 1) broj i datum dokumenta i
 - 2) iznos;
- d) ukupan iznos.

(2) Centralna izborna komisija BiH može zatražiti da nezavisni kandidat dostavi kopiju dokumenata o troškovima propagande (računi, ugovori i dr).

Član 24. **(Obaveze nezavisnog kandidata)**

(1) U Obrazac N5. *Obaveze nezavisnog kandidata* unose se sljedeći podaci:

- a) Obaveze po kreditima i pozajmicama (detalji u Obrascu N5.1.), i to:
 - 1) naziv davaoca kredita ili pozajmice,
 - 2) iznos kredita ili pozajmice,
 - 3) datum realizacije kredita ili pozajmice,
 - 4) rok vraćanja kredita ili pozajmice,
 - 5) iznos obaveze po osnovu kredita ili pozajmice na određeni dan i
 - 6) ukupan iznos
- b) Ostale obaveze (detalji u Obrascu N5.2.), i to:
 - 1) naziv povjerioca ili obaveze,
 - 2) datum nastanka obaveze,
 - 3) iznos obaveze na određeni dan i
 - 4) ukupan iznos.

(2) U Obrazac N5.2. *Ostale obaveze* unose se podaci o obavezama nezavisnog kandidata na kraju izvještajnog perioda po sljedećim osnovama: neizmirene obaveze prema dobavljačima (fizičkim i pravnim licima), obaveze po osnovu naknada, poreza, doprinosa i drugo.

(3) Centralna izborna komisija BiH može zatražiti da nezavisni kandidat dostavi kopije dokumenata o dugovanjima po osnovu kredita, pozajmica ili nekom drugom osnovu.

POGLAVLJE IV. KONTROLA FINANSIJSKIH IZVJEŠTAJA

Član 25. **(Služba za reviziju)**

Prilikom pregleda finansijskih izvještaja, Služba za reviziju, između ostalog, utvrđuje:

- a) je li izvještaj podnesen na propisanim obrascima iz ovog Pravilnika,
- b) jesu li obrasci pravilno popunjeni,
- c) jesu li obrasci potpuni (sveobuhvatni),
- d) je li izvještaj obuhvata sve poslovne promjene,
- e) jesu li analitičke evidencije tačno sabrane,
- f) jesu li podaci u izvještaju pravilno razvrstani po obrascima i
- g) je li izvještaj dostavljen blagovremeno, odnosno u propisanom roku.

Član 26.

(Dobrovoljno otklanjanje nepravilnosti)

(1) Ako Centralna izborna komisija BiH smatra da nezavisni kandidat nije postupio u skladu s odredbama Zakona o finansiranju političkih stranaka, odredbama Poglavlja 15. Izbornog zakona BiH i ovog Pravilnika, prije izricanja kazne ili preduzimanja administrativne mjere nastojat će postići da nezavisni kandidat, za kojeg je ustanovljeno da je prekršio odredbe navedenih zakona i ovog Pravilnika, dobrovoljno postupi i otkloni uočene nepravilnosti, ako su one otklonjive.

(2) Centralna izborna komisija BiH može početi istragu ili preduzeti odgovarajuće mjere samostalno ili po uloženom prigovoru.

Član 27.

(Sankcije i administrativne mjere)

Ako nezavisni kandidat ne postupi na način utvrđen u članu 26. stav (1) ovog Pravilnika, a utvrdi se da je prekršio odredbe Zakona o finansiranju političkih stranaka, Poglavlja 15. Izbornog zakona BiH i ovog Pravilnika, Služba za reviziju predložit će Centralnoj izbornoj komisiji BiH da nezavisnom kandidatu izrekne sankciju ili preduzme odgovarajuću administrativnu mjeru.

POGLAVLJE V. NAČIN PRISTUPA JAVNOSTI INFORMACIJAMA SADRŽANIM U FINANSIJSKIM IZVJEŠTAJIMA

Član 28.

(Finansijski izvještaji)

(1) Izvještaj o prometu posebnog računa za finansiranje izborne kampanje, s podacima o izvorima novčanih i nenovčanih donacija, podacima o svim troškovima (rashodima) izborne kampanje, kao i računima dobavljača i izvršilaca usluga, objavljuje se na internet-stranici Centralne izborne komisije BiH tri dana prije dana održavanja izbora.

(2) Postizborni finansijski izvještaji svih nezavisnih kandidata koji su učestvovali na izborima, a koji su podneseni Centralnoj izbornoj komisiji BiH, objavljuju se na internet-stranici Centralne izborne komisije BiH u roku od 30 (trideset) dana od isteka propisanog roka za podnošenje izvještaja.

(3) Centralna izborna komisija BiH na svojoj internet-stranici objavljuje podatke o maksimalno dozvoljenom iznosu troškova kampanje u skladu s Izbornim zakonom BiH i podatke o troškovima kampanje koji su iskazani u postizbornim finansijskim izvještajima nezavisnih kandidata.

POGLAVLJE VI. ZAVRŠNE ODREDBE

Član 29.

(Upotreba izraza u muškom i ženskom rodu)

Riječi koje su radi preglednosti u ovom Pravilniku navedene u jednom rodu, bez diskriminacije se odnose i na muški i na ženski rod.

Član 30.
(Prestanak primjene)

Danom stupanja na snagu ovog Pravilnika prestaje važiti Pravilnik o predizbornim i postizbornim finansijskim izvještajima i izvještajima o prometu posebnog računa za finansiranje izborne kampanje nezavisnih kandidata (“Službeni glasnik BiH”, broj 31/24).

Član 31.
(Stupanje na snagu i objavljivanje)

Ovaj Pravilnik stupa na snagu danom donošenja, a bit će objavljen u “Službenom glasniku BiH”, “Službenim novinama FBiH”, “Službenom glasniku RS”, “Službenom glasniku Brčko distrikta BiH” i na internet-stranici Centralne izborne komisije BiH.

Broj: 05-01-02-2-714-1/26
Sarajevo, 06.05.2026. godine



Predsjednik

Jovan Kalaba